

Broj: 01-04-4-54/22
Sarajevo, 10.01.2022. godine

Na osnovu člana 10. stav 1. alineja 1. i 7. i člana 69. Statuta Općine Stari Grad Sarajevo - Prečišćeni tekst ("Službene novine Kantona Sarajevo", broj: 20/13) te člana 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine", broj: 49/06 i 51/09), Općinski načelnik Općine Stari Grad Sarajevo, putem Službe za privredu, donosi

ODLUKU

o utvrđivanju uslova i postupka za ostvarivanje prava učešća građana u dodjeli plastenika sa dodatnom opremom i rasadnim materijalom za plastenik na području općine Stari Grad Sarajevo

Član 1.

Ovom Odlukom utvrđuju se uslovi i postupak za ostvarivanje prava učešća građana sa područja Općine Stari Grad Sarajevo u projektu "Proizvodnja u plasticima" (u daljem tekstu Projekat).

Član 2.

Pravo na učešće u Projektu imaju svi zainteresovani građani - fizička lica koja ispunjavaju uslove propisane ovom Odlukom, čije je mjesto prebivališta i zemljište na području Općine Stari Grad Sarajevo.

Uslov za ostvarivanje prava učešća je da kandidati kao podnosioci zahtjeva moraju biti zakonski korisnici minimum 200 m² poljoprivrednog zemljišta (vlasnik, posjednik, nosilac prava korištenja i dr.) pogodnog za plastičnu proizvodnju. Pogodnost zemljišta za plastičnu proizvodnju, utvrđuje Komisija za dodjelu plastenika (u daljem tekstu Komisija) na licu mjesta.

Član 3.

Dodjela plastenika sa dodatnom opremom i rasadnim materijalom vrši se putem Javnog poziva.

Izuzetno, Općinski načelnik može, na prijedlog nadležne općinske Službe za privredu, izvršiti dodjelu plastenika sa dodatnom opremom bez Javnog poziva u opravdanim slučajevima koje nadležna Služba utvrđuje neposrednim uvidom na licu mjesta, kao i uvidom u dostavljenu dokumentaciju, a sve u skladu sa raspoloživim sredstvima u Budžetu.

Dodjela plastenika na način propisan u stavu 2. ovog člana vrši se na osnovu posebne odluke koju Općinski načelnik donosi putem nadležne općinske Službe za privredu.

Sa korisnikom iz stava 2. ovog člana, Općina Stari Grad Sarajevo zaključuje Ugovor o dodjeli plastenika, kojim će se regulisati prava i obaveze obje Ugovorne strane.

Član 4.

Uslovi za utvrđivanje prava učešća kandidata za dodjelu plastenika i dodatne opreme sa rasadnim materijalom za plastenik u Projektu su:

a) Opći uslovi:

1. Da podnosilac zahtjeva ima mjesto prebivališta na području Općine Stari Grad Sarajevo,
2. Da je zakonski korisnik minimum 200 m² zemljišta na području Općine Stari Grad Sarajevo (vlasnik, posjednik, nosilac prava korištenja i drugo),
3. Da je poljoprivredno zemljište pogodno za plasteničku proizvodnju, što utvrđuje Komisija na licu mjesta, u skladu sa pravilima struke (ravno zemljište ili veoma blagog nagiba, ne smije biti vlažno, sklono zabarivanju, dovoljna udaljenost od saobraćajnice i sl.)

b) Dodatni uslovi:

1. Da je podnosilac zahtjeva nezaposlen (nalazi se na evidenciji JU "Služba za zapošljavanje Kantona Sarajevo", Sarajevo) - **15 bodova**
2. Za svakog nezaposlenog punoljetnog člana porodičnog domaćinstva - **5 bodova**
3. Za svakog maloljetnog člana porodičnog domaćinstva - **2 boda**
4. Da je podnosilac zahtjeva penzioner - **10 bodova**
5. Da podnosilac zahtjeva ima priznat status demobilisanog borca - **10 bodova**
6. Da podnosilac zahtjeva ima priznat status RVI - **5 bodova**
7. Status člana porodičnog domaćinstva demobilisanog borac ili RVI - **2 boda**
8. Da podnosilac zahtjeva ima status porodice šehida, poginulih, umrlih ili nestalih boraca - **5 bodova**
9. Da podnosilac zahtjeva ima status civilne žrtve rata podnosioca zahtjeva - **5 bodova**
10. Status civilne žrtve rata člana porodičnog domaćinstva - **2 boda**
11. Da podnosilac zahtjeva ima status neratnog invalida ili da je lice u stanju socijalne potrebe - **5 bodova**
12. Da podnosilac zahtjeva ima priznat status logoraša - **5 bodova**
13. Član porodičnog domaćinstva ima priznat status logoraša - **2 boda**
14. Svaki član domaćinstva - **2 boda**

U slučaju da kandidati kod bodovanja imaju isti broj bodova, prednost će imati onaj kandidat čiji je porodični standard niži.

Član 5.

Uz zahtjev za dodjelu plastenika sa rasadnim materijalom za plastenik potrebno je priložiti dokaze o ispunjavanju općih i dodatnih uslova navedenih u članu 3. ove Odluke (ukoliko podnosilac zahtjeva ispunjava i dodatne uslove).

Prijave na Javni poziv podnose se predajom na šalteru protokola u zgradi Općine Stari Grad Sarajevo ili putem pošte u zatvorenoj koverti. Služba za privredu Općine Stari Grad Sarajevo će pozivati učesnike radi eventualne upotpune dokumentacije u toku trajanja Javnog poziva. Ukoliko učesnici i nakon datih uputa od strane nadležne Službe ne postupe po istim, zahtjevima sa nepotpunom dokumentacijom neće se uzimati u razmatranje.

Član 6.

Postupak za ostvarivanje prava učešća građana u Projektu provodi Komisija, koju Rješenjem imenuje Općinski načelnik, a Odluku o izboru kandidata i lokacija za postavljanje plastenika na prijedlog Komisije donosi Općinski načelnik Općine Stari Grad Sarajevo.

Izabrani kandidati potpisuju Ugovor o dodjeli plastenika i dodatne opreme sa rasadnim materijalom za plastenik sa Općinom Stari Grad Sarajevo, čime se obavezuju na poštivanje odredbi istog.

Član 7.

Rok za podnošenje prijave na Javni poziv je deset (10) dana od dana objavljivanja Javnog poziva. Za realizaciju ove Odluke zadužuje se Služba za privredu Općine Stari Grad Sarajevo.

Član 8.

Ova Odluka stupa na snagu danom donošenja, a bit će objavljena na oglasnoj ploči i web stranici Općine Stari Grad Sarajevo, kao i na oglasnim pločama mjesnih zajednica.

Član 9.

Stupanjem na snagu ove Odluke, prestaje da važi Odluka Općinskog načelnika Općine Stari Grad Sarajevo, broj: 01-04-4-337/21 od 26.02.2021. godine.

Stručna obrada:

Firdeusa Hadžimurtezić, dipl. ing. polj.

Emir Huremović, dr. vet. med.

POMOĆNICA NAČELNIKA

Aldiana Kavazović, dipl. pravnik

OPĆINSKI NAČELNIK

mr. Ibrahim Hadžibajrić

Dostaviti:

1. Služba Kabineta Općinskog načelnika
2. Sekretar organa državne službe
3. Komisija za dodjelu plastenika
4. Služba za opću upravu i inspeksijske poslove
5. Služba za lokalni razvoj i poslove mjesnih zajednica
6. Služba za odnose s javnošću i informacioni sistem
7. Evidencija
8. a/a